

O Volapükafleus Voläpo!

Din bal, keli alan obas dunon, binon ad reidön Volapüki. Va reidobs oni gudiko, u negudiko; vifiko u nevifiko, atosi alan obas dunon.

Atans, kels neai elärnons Volapüki, sagonz pö loged balid ko jekäl: Pük kion fikulik! Neai okanob lärnön püki somik. Vero-li? Pösods Yuropik mödik ya elärnons Tsyinänapüki, Larabänapüki, äsi pükis votik, kels binons mu fikuliks pro fuginäns - ed edunons osi legudiko!

Primölans, kels gebons tidodemi gudik, lärnons ad reidön skilöfiko, ab balugiko. Mutoy jenöfo distükön nivodis difik reidedas. As redakan gaseda Volapükik, dasevob, das reidans valik no kanons reidön yegedis nolavik, samo, bi binons tu fikuliks. Sekü atos, välob yegedis alsotik - balugikis, kels lönedons pro utans, kels no dalabons noli gretik püka, ab kels vilons gebön noli pemiedüköl onsik; zänedikis, kels lönedons pro pluamanum reidanas; ab no glömobšös id utanis ko nol legudik, kels vilons, id ons, skilükön okis.

Verat binon, das alan obas lärnön laidüpo. Do edunob Volapüki dü yels mödik, id ob lärnob ai. No ai sevob vödi alik, keli reidob, ab ekö metod legudik ad pagebön fa pösod alik in tef at:

Balido dareidölös yegedi lölik. Tän sagölös ole: Liomödoti esuemob-li? Fümiko usuemol bos, ed igo plu ka bos. Egaenol-li siämi valemik yegeda? Gudö! Anu kanol gudükumön suemi olik: Dislientukölös vödi, keli no esuemol (u dunölös lisedi patik if no vilol dämükön padi), tän: steifülölös ad tuvedön siämi vöda yumedü vödem - at binon tidod gudik! Ab if no oplöpo, tän sukolös vödi in vödabuk e penölös oni su lised patik ola. Pianiko olärmol vödis nekösömik. Ab no dunölöd tu mödikosi pö naed bal!

Valikosi Gudikün Oles ed Olikanes

*sebam Ralph*

VISKID - JENOTEM MEDITABIK

(fa hiel John Henry Mackay

Bü yels anik äbelödob dü vigs ömik lotidöpi, büä äfärmikon dü nifup, len elak „Brienzersee“ in Jveizän. Fluküp ikömon latiko; stom äbinon naudodik; älogob dü vigs at fol ti nosi belas e laka. Ab ämutob finükön vobodi oba, ed äjäfob me on in fog e stil.

Lotidöp ya tio ävagon. Igo sufädikünans obas ämofugobs demü rein aldelik. Semiknaiko äkömon nog beian latik se belem; obs verätiko ai nog päzufälobs.

Obs: Atos äbinon plä ob nog ji-Linglänan labü bäldot nefümetovik, balan jafäbas mägik in klotem kamforasmelöl, kels hitüpo tuvisitofs läni jönik at, valöpo fisuköl bordöpis nejerik e valöpo tuvöl, me füm nepölovik, nejerikünis bevü ya so nejeriks, ad fimikön in ets äsä tarms in plädodem.

Ji-Linglänan obik ädistof dub nos dö jileigalänans ofa, pläs ätävof no grupo äs atans, ab soeliko. Noe ätävof soeliko, abi äbejäfob ad blebön soelik. Ibä do ikelotobs dü vigs as lotidäbs lätik in dom ot, äspikob ko of ne plu ka ba mälna, e nonikna plu ka vöds anik lindifik. E no älogob ofi spikön ko men votik plä cäläbs, ed i ko atans klüliko te dö zesüdikünos.

Äblebof lä ok soäs ob. Ed if no iseadobsöv visü od nomädo zedelo e soaro - of in gul bal, ob in gul votik fidalecema vagik gretik, nonikna ülogob ofi, ed ökanob pölacedön ofi as lotidäb soelik doma.

Ifi leno änitedof obi, e toä prinsipo no jäfikob me dinäds menas votik äsi lifakösömots pösoda, ven lödoy soeliko ko pösod somik dü vigs dis nuf ot, no kanoy blebön foginiks. So äküpob itjäfidiko, das nonikna äläädof se bed bü zedel; tän ad fided ädoniokömo poszedelo; if äreinos (ed ai äreinos) äklänedof oki jü soar in gul glätayala, ad luslugiko reidön toumis lemödik elana „Tauchnitz,“ e pos säned änepubof sunädo ini cem oka, kelas fenäts täno lunüpo, suvo jü göda-

düps, äblebons pelitüköls. Ämutob küpön atosi, bi ätopons visü obiks e liedö! vobod oba suvo äkodon gali leigolunüpick oba.

Ni ägetedof visitanis, ni ägetof penedis; nonikna äreidof gasesi, ed äjinof tikologön te reidedi diotik oka - äbinof balvödo dabinan neklatikün, keli äkanoy fomälön. Reto äjinof lifön no pöfiko, ibä bü yan ofa ästanons tröks anik gretik binü mater legudikün, e mod, pö kel dünans äfölonis vipis ofa, ämalon, das ämesedof dünotis onas medü drinamon legudik. Güo lotidöpan too, pläs äbelotof cemi gudikün doma, ämeritom nosi plä bordamon fa of, ibä plä fidäds, no äbonedof zibi, e pö fids, klüliko demü ji-Linglänan, ädrinof te vati nen lägivot, atosi ye lemödiko, äsä ai älogob lejekiko. Balna ün vig valik älovevegof ini zif „Thun,“ kiöpao alna ägeikof ko päked bigik. Keli äramenof us, uti no äfikulosöv ad tuvedön, ifi no balna ituvob ofi lä bukatedan usik, kü äsesukof toumis ofe di „Tauchnitz.“ „Ai stupädikis e lunikumis,“ äsagom etan smilöliko, kü äplödikof, „ed ai onu teldegis me naed bal - laidareman gudik!“

Atos päfövon e säsun äfinikon. Attimo äkolkömob ofi ün del anik pö stemanaf somik. Äseadob su däk bü denafam ed ämeditob ebo va to rein ölöpablibob u va ödoniofugob, ven älogob logodi ofa da fenät klöpik kayüta. Ün yelasäsun at, ed in stom at, ketävans ti noniks klada balid äbinons in stemanafs, e go äsoelikof us dono. Äsludob ad blibön löpo, ed ävilob ebo votükön pladi oba, ad no palogön fa of, if logof-la löpio, ven nogna älogob logodi ofa ed äbleibob seadön nenviliko. Ibä äjinos obe süpo, äsva älogob balidna dabinani bäldiköl at, ed äsva äbinof pösod levotik, ka atan, keli äkolkömob aldelo nu ya dü vigs pluik.

Äjinof spikön ko ok it, ibä lips nenkölik ofa ämufons konvuliko, du logs ofa älogetons nenlogedo. Äkredob primo, das imalädikof, ed ävilob doniogolön. Ab ya lips ofa no plu ädremons, e notod logetik logas äpasetikon. Äfärmikons nevifiko, e fen dibik äseiton oki sui logod faalik e gedik; fen, kel älabon kleiliko te vip bal at: dalön slipön . . .

Ab no äslipof. Ibä, ven nu, ya pos brefüp, ägemaifükof logis, ekö!  
äsinob, das no äbinon fen, ab däsper jeikik, kel äseaton in ons, e das no vip  
slipa, ab ledesir ad spikon se ons, ed äsuumob, das äbinon men vemo neläbik  
ut, kel äseaton us; men neläbik, so nenspeliko, das nos in vol äkanon yufön  
ofi, nemuiko ye men votik. Älöstanob nelaodiko, ed äcänob pladi. No plu  
äsenob reini, kel nu ädoniosturon flumo.

Pos düp bal ädönuloegob ofi in lotidöp seadöli in flökastul ofa ko  
reidot ofa, e neito fenät ofa dönu äblebon litik lunüpo.

Äspikob ko of ünü dels degfol sököli, ünü kels nog päzufälobs, so  
nemödiko äs jünü, ed üf glid seilik oba äbinon-la nensevedo stümikum ka  
jünü, atos fümiko no päküpön fa of.

Del motäva ikömon, e lotidöp päfärmükön. Vob oba äbinon blümik,  
ed äfredob ad gekömön lü zif „Zürich“ lä flens nenulik e dönu bevü sevädans.  
Ven zedelo ädoniokömob ad fided lätik, lädül Emily Dunstan ya imotävofo, e  
cem ofa ävagon.

Du äleditob de lotidöpan, ko kel iflenikob, ed ävegolobs luyali,  
ästopom, ed äsagom:

„Ag, kömorös, vilob nog jonön bosi ore.”

Änügolobs ini cem, keli ji-Linglänan ibelödof. Lotidöpan ägolon foi  
klotamar ad ämaifükom yanis. Su boeds löpik äseatons toums pereidöl anik  
di „Tauchnitz.” Dono ye ästanon, kedetü lunik, mödot fladas gretik, vagik.

Äbiegädob, ed äsuumob löpio bali: Ekö! „Dewars Old Scotch  
Highland Whisky” päpenon su ninädaklebazöt.

„Binons kuratiko kildeg,” äsagom lotidöpan, e kurato dü dels kildeg  
älödof lä ob. Ab utos, keli notiko nog ävilom sagön, no äsagom, ven älogom  
notodi logoda oba. Ibä älememob minutis et, ünü kels ilogob jütani su naf,  
e dü kels ikredof, das nek iküpedon ofi



VOL GUDIKUMON AI – AB PIANIKO

(fa hiel John Redgwell)

Tü del 5-id febula, yela 2008, hiel Maharishi Mahesh Yogi ädeadam. Man noumik at äblinom sevi vesüdänes, kel ya primon ad gudükumön voli.

Da milyels penäds vönik Lindäna ädabinons te as penäds müsterik. Ästudoy onis in nivers kobü literat vönik e pük sanskritik, ab nek äsuemon sinifi veratik onas. El Maharishi Mahesh Yogi ädonutövom sinifi at, ed ägivom divis seva at vole lölik.

Büä el Maharishi ilükömom ini vesüdäns, medit is äbinon fikulik, ed äflagon säntreti gretik. Ab el Maharishi, medü suem veratik oka literata vönik, ätövom jenöfo, das medit binon bit natik, nentöbik.

Ven meditoy, plakoy valami. Literat vönik Lindänik nemon valami at : „*Brahm.*” Vöds : „*Aham Brahm asmi*” sinifons : „*Ob binob valam.*” Valam binon in dabinäds valik. Binos nitedik, äsä äküpetom el Maharishi, das nolav nutimik etüvon valami, e nemon oni : „*Feled Pebalöl.*” Nolavanes, ye, „*Feled Pebalöl*” binon te teorod, keli gebons ad plänön pubodis füsüdik.

Ven meditoy, e plakoy stadi at as binäl bina okik, gaenoy buädis mödik pro ok äsi pro votikans, bi vedoy flenikum, läs hetialik, läs tatakiälik, bi lifükoy lonis natik in ok it.

Sev somik, keli el Maharishi ätidom, kanon yufön noe grupis menas, abi länis lölik, e seko voli lölik. Ven grups gretik menas plägons kaeni meditik nemü „T.M,” e kaeni nemü : „T.M. sidhis,” jafons vefis kohedöfik in tikäl valemik. Atos, turno, flunon tikälis menas pösodik valik.

Ün yels büik, cifs länas valik vola äkredons, das med soalik ad jafön neti nevikodovik flagon vafis legretik, kels kanons distukön lezifis e deidön menis mödik. Tatakiäl, ye, lübäton tatakiäli votikanas. Kredons, das med soalik ad jelön okis ta tataks netas votik flagon vafis legretik lönik. Ekö stad dinas dü milit koldik sonemik. E jenon ai

dönu! Ojenon-li milit gretik, kel odistukon voli lölik?


Danädü el Maharishi Mahesh Yogi, milit somik no ojenon. Püdadisin omik okodon, das seved koböfik netas valik olöpikon lü nivod geilik, seko cifs länas no plu okredons, das täd tataka flagons tädi geik.

El Maharishi äsagom, das cifs läna seimik binons äs loks, kels fläkons tikälastadi menas in län oksik. Sosus lomänans ovedons püdiks äsi fleniks menas valik, cifs läna ovedons id ons püdiks e fleniks cifes länas votik. Osevens fino, das no okanons jelön netis okik ta tataks yufü vafs. Ven net vedon flenik, net votik nonik vilon tatakön oni. Het onepubon; poplaädon me suem rezipik bevü nets vola. Stad at flagon löpükami seveda koböfik netas valik. Atos porivon me grups legretik menas nemü : „*pandits*," kels plägons kaenis patik. Grups somik dabinons nu in läns valik vola.

Plä disin gretik ad jafön püdi volik laidik, el Maharishi äblinom sevi mödik, kel yufon voli in feled dugäla, sana, gita, nolava e bumava; samo ägivom obes sevi ad jafön bumotis, kels kanons gudükumön sauni obsik sekü däsin patik. Nemoy nolavi at : „*Sthapatya Veda*."

Do vol no nog dalabon valöpo püdi, too votikon ai pianiko. Büä ädeadom, el Maharishi älesagom, das Nedän ya binon net nevikodovik. E Tats-Pebalöl löpikons lü stad ot. Nets retik valik vola osökons.

El Maharishi Mahesh Yogi egeridom vole kiki fütüra nen milits, nen het e nen maläds deidik. Binobsös danöfiks tefü man noumik at!



LEVAL STÄÄNIKÖL  
(fa hiel Frank Roger)

Ägolölo jiel Jennifer da cem, hiel Harrold, matan ofa, kel äseadom, äs kösömiko, in bradastul kovenik oka, älöpiologom de gased, keli äreidom, ed äsagom:

„Reidob yegedi jänälik is. Ba id ol sötöl reidön oni.”

„Jenöfö! Kisi tefon-li?”

„Tefon stäänikami levala medü vöds balugik

„Ag! o Harrold. Vilob ladöfiko, das kanol-la nitedälön dö dins  
aldelik lifa - samo: vob in dom, nen mäniotön mati obas.”

„Ag! o Jennifer, begö! No primolös blöfädi et dönu. Id ob  
vilob, das kanol-la jonön nitedi mödikum pro nolav, e pro dins veütikün  
lifa.”

„Vilol-li sagön, das, cedü ol, mat obas labon veüti nepluik?”

„Neai esagob atosi.”

„Ab atos kanos kleilükön kikodo mat obas jinon sökön vegi  
dobik.”

„No kanob fomälön, dö kis spikol.”

„Ekö on in yeged, kel reidol, o Harrold. Ba sötöl gereidön oni  
kälöfiko nog balna, ed otuvol us kodi säkädas obsik.”

El Harrold ästunolülogom seilo ofi.

„O Jennifer, dö kis spikol-li?”

„O Harrold, dalilolös obi. Säkäds obsik blöfons teorodi ola  
levala stääniköl.”

El Harrold ästunologom ofi ai, ed äläükof:

„Atos kleilükos kikodo ditobs te pianiko, ab bit at ovifikumon ed  
orivon fino seki nevitovik.”

Älödükof oki lü kvisinöp.

Vütimo el Harrold ämeditom leigöfi küpädik vü stelafüsüd e mat  
oka.

DIV REGA SALOMON (7)

